

四庫全書

史部

欽定四庫全書

史部

唐大詔令集卷一

至四

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

謄錄舉人臣徐元辰

欽定四庫全書

史部六

唐大詔令集

詔令奏議類一

詔令之屬

提要

臣等謹案唐大詔令集一百三十卷宋宋敏求編敏求字次道趙州平棘人參知政事綬之子進士及第官至史館修撰龍圖閣直學士事蹟具宋史本傳敏求嘗預修唐書又私撰唐武宗以下實錄一百四十八卷於唐代

史事最熟此集則本其父授手輯之本重加
訂正為三十類熙寧三年自為之序稱繕寫
成編會忤權解職顧翰墨無所事第取唐詔
令目其集而弃藏之云云蓋其以封還李定
詞頭由知制誥罷奉朝請時也其書世無刊
本轉輟抄傳訛誤頗甚中闕卷第十四至二
十四八十七至九十八凡二十三卷參校諸
本皆同其脫佚蓋已久矣唐有天下三百年

號令文章燦然明備敏求父子復為裒輯編
類使一代高文典冊眉列掌示洵足為考据
之資其中不盡可解者如裴度門下侍郎彰
義軍節度使宣慰等使制據舊唐書其文乃
令狐楚所草制出後度請改制內剪其類為
革其志改更張琴瑟為近輟樞衡改煩我台
席為授以成算憲宗從之楚亦因此罷內職
是當時宣布者即度奏改之辭今此集所載

尚仍楚原文不依改本未詳何故又寶歷元年冊尊號赦據敬宗本紀時李紳貶官李逢吉等不欲紳量移乃於赦書節文內但言左降官已經量移者量移近處不言未量移者宜與量移翰林學士上疏論列帝命追赦書添改之今此集所載祇及赦罪一條而無左降官量移之文疑亦有所逸脫又舊唐書所載詔旨最多今取以相校其大半已入此集

而亦有遺落未載者如紀號則改元天祐詔
除授則尹思貞御史大夫李光弼兵馬副元
帥諸制追贈則張說贈太師楊綰顏真卿李
絳贈司徒郭曖贈太傅鄭朗贈司空田布贈
僕射諸詔優禮則杜佑蕭俛致仕諸詔獎勸
則勞解琬獎李朝隱褒美令狐彰獎伊西北
庭二鎮諸詔謫降則王毛仲韓皋呂渭張又
新李續之熊望貶官諸詔誅竄則決殺長孫

所流裴景仙裴茂諸勅皆關朝廷舉措之大者而此集並闕而不登以敏求博洽不應疎於蒐採或即在散佚之中亦未可定究不免於放失不完之憾然唐朝實錄今既無存其詔誥命令之得以考見者實藉有是書亦可稱典故之淵海矣乾隆四十四年九月恭校上

總纂官

臣紀昀

陸錫熊

臣孫士毅

總校官

臣陸

費

墀

唐大詔令集原序

唐大詔令集者先君宣獻公景祐中書第三闕所纂也
先公以文章名世更內外制之選而朝廷典冊多以屬
之及入陪宰政仁宗數面命撰述於是有中宮冊文三
后不遷及條列兵農置睦親宅朝集院等詔機務之隙
因裒唐之德音號令非常所出者彙之未次甲乙未為標
識而昊天不弔梁木遽壞小子不肖大懼失墜秘其書
於家楹者蓋有年矣僕射王文安公累以為問謂當垂

世不朽乃緒正舊業十三類總一百三十卷文安見許
序而名之未果而公薨治平二年先皇帝簡拔孤陋賔
在西掖固欲澡雪蒙滯而鑽仰衆製方繕寫成編會忤
權解職顧翰墨無所事第取唐大詔令目其集而棄藏
之云熙寧三年九月晦右諫議大夫宋敏求謹序

欽定四庫全書

唐大詔令集卷一

宋 宋敏求 編

帝王

即位冊文

太宗即位冊文

肅宗即位冊文

德宗即位冊文

順宗即位冊文

憲宗即位冊文

穆宗即位冊文

敬宗即位冊文

文宗即位冊文

宣宗即位冊文

懿宗即位冊文

哀宗即位冊文

即位冊文

太宗即位冊文

維武德九年歲次丙戌八月丙辰朔九日甲子

云云夫

天生蒸民樹以司牧三靈輔德百姓與能粵自夏殷傳業循祚軌物長世罔不由茲朕祗膺靈命肇開寶厯聲教所覃無思不服然而萬幾填委九區輻湊明發不寐考極觀書聽政勞神經謀損慮深思間曠釋茲重負咨爾聰明神武實天生德君人之量爰備夙成王業初基雲雷

伊始英謀獨斷秘策潛申及拓定關隴澄清河洛北通
玄塞東靜青丘宏圖遐舉元功克茂氛霧廓清鯨鯢斯
靜澤霑方外聲暢無垠總統機衡百工以乂敷弘德化
四門允穆謳歌所屬宇內宅心象緯告徵靈命斯在朕
是用上稽蒼昊俯順黔黎推而弗居永垂顯號今傳皇
帝位於爾躬命司空魏國公寂尚書左僕射宋國公瑀
齋璽綬授爾其纂成洪緒對揚休命式隆寶祚以康四
海

肅宗即位冊文

維天寶十五載歲次丙申七月癸丑朔十二日甲子皇帝若曰咨爾元子某維天為大惟人君則之順乃德故舜禹揖讓而履皇極弗乃道故丹朱商均不能保鴻業是以咨有惠迪而夏嗣焉隋有亂紀而唐受焉五聖之御極皆勤儉兢業日慎一日故能享祚長久垂慶無窮洎子六葉忝位四紀厭于勤倦緬慕汾陽當保靜怡神思我烈祖玄元之道是用命爾元子某當位嗣統於戲爾

有忠孝之誠極於君父爾有友愛之義信于兄弟爾有仁恕之行通于神明爾有戡難之才彰於兆庶予懋乃懿績嘉乃神武天之歷數在爾躬汝惟推誠禍亂將興爾而能清汝惟從諫社稷將興爾而復寧佞言為疵直言惟師任賢勿貳去邪勿疑民非后何戴后非賢罔與守邦欽哉慎乃有位無忝我祖宗之丕烈

德宗即位冊文

維大歷十四年歲次己未五月辛丑朔二十三日癸亥

皇帝若曰於戲昊天有命皇王受之立嫡以賢春秋之
義傳之於子漢氏成規宗廟社稷實賴其慶咨爾皇太
子迺稟天地之仁含日月之耀道光三善孝著十倫頃
者國步多艱委以戎律理軍靖難保大定功克復帝圖
廓清妖孽既表建侯之策俾承守器之重仁孝之德夙
夜惟寅朕天命有終弗興弗寤非至公無以主天下非
至德無以臨四海是用命汝陟於元后嗣守皇業上繼
宗祧下安羣望其命門下侍郎同中書門下平章事常

卷一
袞奉冊即皇帝位於戲宜遵太宗之法度肅宗之儉約
任賢勿貳去邪勿疑與衆守邦祇敬予訓

順宗即位冊文

維貞元二十一年歲次乙酉正月辛未朔二十三日癸
巳皇帝若曰於戲天下之大實惟重器祖宗之業允屬
元良咨爾皇太子誦膺哲溫恭寬仁慈惠文武之道稟
自生知孝友之誠發於天性自膺上嗣毓德春闈恪慎
于厥躬祇勤於大訓必能誕敷至化安勤庶邦朕寢疾

彌留弗興弗寤是用命爾繼統俾紹前烈宜陟元后永
綏兆人其命中書侍郎同中書門下平章事高郢奉冊
即皇帝位爾惟奉若天道以康四海懋建皇極以熙庶
工無忝我高祖太宗之休烈

憲宗即位冊文

維永貞元年歲次乙酉八月丁酉朔九日乙巳太上皇
若曰咨爾皇太子純惟皇上帝降休於我家用集大命
克綏厥猷惟后祗率大典茲惟艱哉朕承累聖休德膺

守邦之重不蒙天佑降疾在躬上不能昭事郊丘祇見
烈祖下不能臨視庶政保綏兆人是用命爾當位嗣統
宜陟元后代予憂勤今遣使檢校司徒平章事杜佑副
使門下侍郎平章事杜黃裳持節冊命於戲爾有光大
之德敷於萬邦爾有仁孝之誠型于九族慈和寬簡克
饗天心玄符不可以固違明命不可以不畏爾惟察納
忠直子惠困窮咨於正言慎乃儉德臨庶官以信安庶
獄以情允執厥中無忝我祖宗之丕訓

穆宗即位冊文

維元和十五年歲次庚子閏正月甲辰朔三日丙午皇帝若曰於戲上天降鑒保佑於我國家十聖丕承光宅四海鴻休大業以逮予一人嚴恭祇畏懼弗克荷賴宗社垂慶生靈乂安今朕寢疾彌留弗興弗寤神器所付屬之元良咨爾皇太子恒孝友聰明溫文睿哲自主七鬯日新厥德必能繼予勤志綏靖萬邦是用命爾陟于元后宜令中書門下侍郎平章事令狐楚奉冊即皇帝

卷一
位懋建皇極無忝我祖宗之休烈

敬宗即位冊文

維長慶四年歲次甲辰正月辛亥朔二十六日丙子皇帝若曰惟天輔唐德我祖宗克答天意邁德勤道紹休大業洎予一人嗣守四海祇事天地愛育萬類罔或怠惰於茲五年今寢疾彌留不興不寤獲以重器付之元良咨爾皇太子湛列祖儲慶自天生德孝友慈惠溫良敬恭必能輯寧家邦輝光緒業是用命爾陟於元后宜

令中書侍郎平章事牛僧孺奉冊即皇帝位爾有廣厚之量可以奉天地爾有孝敬之志可以事神祇和惠可以撫萬邦仁愛可以親九族任賢尚德遠佞去邪爾惟欽承無忝我祖宗之休烈

文宗即位冊文

維寶曆二年歲次丙午十二月甲午朔十二日乙巳太皇太后若曰大行皇帝睿哲英靈對天明命方夏底績夷蠻貢庭罔有不端大康有截宜荷九廟之重永享億

年之祿豈虞姦妖竊發矯專神器蠱惑中外扇誘羣萌
駭動神人釁深梟獍咨爾江王某聰哲孕粹清明敏和
智筭機開玄謀電發躬率義勇大清允徒且膺當璧之
符爰攄枕戈之憤既殲巨害當享豐福是用命爾陟於
元后宜令司空平章事裴度奉冊即皇帝位永惟高祖
太宗之剪定隋亂玄宗之寢漬利澤憲宗之監拔蠹孽
艱難險阻勗乃負荷小心以事上帝儉德以型家邦懋
於令聞持久如始敬之哉

宣宗即位冊文

維會昌六年歲次丙寅三月壬寅朔二十六日丁卯皇
帝若曰惟玄穹降祚啟我唐運奕葉重暉赫義纂承
列聖顧瞻敷佑冲昧獲承大寶君臨兆人懼不能任夙夜
兢厲祇事九廟於今七年實賴宗社之靈台衮之輔忠
良畢力內外協心北剪山戎東殲孽豎不失傳付之業
方期仁壽之寧屬頤護或虧寒暑致恙禱神餌藥有加
無瘳乃親賢而委家國皇太叔權勾當軍國政事溫慈

睿哲孝友端明蘊東平為善之心尚河間好學之志必
能燾煦天下穆清大中於戲惟敬惟和克敏克寬斥去
奇邪親任仁人是用終陟元后宜令某官奉冊即皇帝
位欽若天道緝熙帝圖懋哉敬哉

懿宗即位冊文

維大中十三年歲次己卯八月甲申朔十三日丙申皇
帝若曰眷彼羣生必有司牧繼承丕構允屬元良故命
嗣惟賢立賢則長夏禹惟公於聖子漢文終守其成規

茲乃萬國攸同百王不易之道也朕以菲薄獲奉宗祧
十有四年未臻至理惟天示譴降疚于躬藥石無功彌
留斯迫歷數云在天命有歸咨爾皇太子朕之元子幼
有聖質孝敬溫文弘博慎敏稟天地之仁闕含日月之貞
明承訓嚮方秉禮抱義是用命爾陟於元后宜令攝中
書令中書侍郎兼禮部尚書平章事蕭朗奉冊即皇帝
位邦家以寧統緒以正惟嚴恭祗畏可以事天地惟寬
明睿哲可以御臣下惟慈惠欽和可以撫黎庶惟道罔

弗惟賢必親實爾生知豈竢訓誨著於典冊無事文詞
懋昭耿光紹休前烈於戲敬之於戲戒之

哀宗即位冊文

維天祐元年歲次甲子八月壬辰朔十五日丙申皇后
若曰高祖太宗撥亂返正奄有天下垂三百年重熙累
聖莫不功光祖業克紹丕圖予遭家不造變起宮奚雖
號慟期至於終天而負荷實先於立嗣咨爾皇太子監
國事天資岐嶷神授英明孝比東平之蒼學富陳留之

植恭謙守政和順稱仁友愛聞於弟兄令譽播於區宇
比則隆元帥深暢戎機今乃位儲宮益歸羣望是用爰
循舊典上纂鴻基既允集於天下當欽承於宗社宜即
皇帝位於戲萬幾不可以久曠四海不可以乏君膺紹
寶圖光踐皇阼節儉以勵戎夏文德以戢干戈無怠無
荒克慈克悌永保厥躬用揚祖宗之丕績休命可不敬
哉

唐大詔令集卷一

欽定四庫全書

唐大詔令集卷二

宋 宋敏求 編

帝王

即位赦上

神堯即位赦

太宗即位赦

中宗即位赦

睿宗即位赦

明宗即位赦

肅宗即位赦

代宗即位赦

順宗即位赦

穆宗即位赦

敬宗即位赦優賜諸軍詔

即位赦上

神堯即位赦

詔曰舜禹殊時禪代存乎揖讓殷周異世革命事乎干戈至於據龍圖握鳳紀統御皇極撫拯黎民奄有四方朝宗萬國垂法作則其揆一焉朕以寡薄屬彼澆季大業末年網維廢弛三光改耀九服移心既戡定時難緝和庶績一匡海內再造黎元隋氏以天祿永終歷數攸在敬禪厥位授於朕躬顧惟慙德屬當景運懼甚履冰慄乎御朽上答蒼靈之睠俯順億兆之心寶厯初基普

天同慶宜布茲寬惠咸與惟新可大赦天下改隋義寧
二年為武德元年自五月二十日昧爽以前罪無輕重
已發露未發露皆赦除之子殺父奴殺主不在赦限百
官及庶人賜爵一級義師所行之處給復三年自餘給
復一年孝子順孫義夫節婦旌表門閭孝弟力田鰥寡
孤獨量加賑恤

太宗即位赦

詔曰惟天為大七政所以授時惟辟奉天三才所以育

物故能彌綸宇宙經緯乾坤大庇生民闡揚鴻烈我大唐誕膺嘉運載協休期丕受龍圖肇開鳳紀太上皇猷齊作聖睿哲欽明奄有八荒光宅四表牢籠軒昊躡跨殷周金鏡俯臨玉燭遐被然而至德弗宰成功不居高謝萬邦委茲重器郊禋曠典士民翹矚欽惟宗社義存享獻朕以寡昧實膺統緒辭不獲免式纂洪業靈命既臻是昇寶位居臨兆庶繼軌百王若涉大川罔知攸濟方咨令哲共康至道今紹祚伊始奉答天休思俾惠澤

被於黎獻可大赦天下自武德九年八月九日昧爽已前罪無輕重已發覺未發覺因徒繫者悉從原免武德元年以來流配者亦並放還凡厥庶寮進爵一級其五品以上先無爵邑者封關國男六品以下各加一轉關內及蒲芮虞秦陝鼎六州免二年租調自餘率土普給復一年年八十以上各賜米二石綿帛五段百歲以上各賜米四石綿帛十段仍加版授以旌尚齒鰥寡孤獨不自存者量事優卹其有至孝純著達於鄉黨徵諸闕廷厚

加褒擢節義之太貞順之婦州府列上旌表門閭高年碩
學直言正諫所在長官隨狀荐舉亡命山澤挾藏軍器
百日不首復罪如初以赦前事告言者以其罪罪之

中宗即位赦

門下天地盈虛四時有消息之度皇王興替五運有遷
革之期稱號殊驪駟亦異受明命者固不由茲我大
唐高祖神堯皇帝聖期首出天與神器有大功於區夏
有大造於生靈太宗文武聖皇道則繼明業推構極類商

湯之起亳若姬發之承周彈壓九皇牢籠萬古高宗天
皇大帝上聖御圖大明司契手調元氣心運洪鑪齊五
緯而平太階應三神而登日觀網羅開闢包冠義胥大
猷備闡能事斯畢仙駕不追逆臣開釁敬業挺災于淮
甸務挺潛應於沙場天柱將搖地維方撓非撥亂之神
功不能定人之危矣則天大聖皇帝亶聰成德濬哲應
期用初九之英謨開太一之宏畧振玉鈴而殪封豕授
金鉞而斬長鯨受河洛之圖書當昊羲之歷數惠育黎

獻並登仁壽既而凝懷問道屬想無為以大寶為勞生
遂復泰^{於頤}辟且有後命俾承先緒光啟大唐之圖用崇興
復之基交際在辰情深感慰奉高祖之宗廟遵太宗之
社稷不失舊物實在於茲業既惟新事宜更始可改太
周為唐社稷宗廟陵寢郊祀禮樂行運旗幟服色天地
等宇臺閣官名一事已上並依永淳已前故事其神都
依舊為東都北都依舊為并州大都督府永昌來庭兩
縣並從廢省其百姓依舊分屬河南洛陽兩縣周朝宗

廟陵寢及官宜令所司商量處分朕之遠系出自老君
靈佑所資貽慶長久宜依舊上尊號為玄元皇帝省司
差使冊告天下村落佛堂並令開門洒掃不得因茲聚
斂創加修葺庠序之規風教之首京都兩學尚且闕修
欲令四方何以取則其京都學館及先聖廟堂所有破
壞未營造者逐要修葺速令畢功不得浪有勞擾樂府
之設國風所繫豈惟易俗抑且和神至若絲竹繁聲倡
優雜伎深乖禮則並宜量事減省國之禮儀已經改撰

隨時逐變務在弘通宜令禮官重加詳審於行事有不
便者即從損益制勅刪定處分已久宜從易簡務速施
行設官固須量才稱職比來委任稍亦乖方遂使鞠獄
推囚不專法寺撰文修史豈任秘書營造無取於將作
句勘罕從於比部多差別使人着判官在於本司便是
曠位並須循名責實不得越守侵官皇家親屬籍沒者
則天大聖皇帝雖已溥暢鴻恩其先有任五品已上官
枉遭陷害者並宜加改葬式遵典禮若有後嗣還其資

蔭其別勅安置并左貶者亦復其屬籍量還官爵仍遣諸
流移人除犯贓賄及畜蠱毒造偽避讐並反逆緣坐
勘會不免者餘並放還天下軍鎮不要者多轉輸艱辛
府庫虛耗事須改弊不可循常宜簡內外官人有材識
者分為充使巡邊按覆須留鎮遏及應減一事已上並
委使人共所管詳度還日具利害聞奏其應支兵先取
當土及側近人仍隨地配割分州定數年滿差替各出
本州永為格例不得踰越五品以上致仕曾伏事先朝

者賜爵一級曾任州府幕府及任洛州牧日官人並勳
責聞奏經任東宮僚見任六品官計階應入五品者特
宜不拘年限餘依常例三衛細引主帥直司行署番官
七絕等通前各減二年勞考滿日各加勳一轉合得官
者稍與處分中書門下官人計階考入五品者優量令吏
番官准羽林例處分分直者及外司官典二十二日誅
賊之時緣祇承在中書省者各賜勳一轉諸司有品高
宜加一階無品直司賜勳一轉禮官緣即位修執儀注者

各賜物二十段正月當番三衛監門等於武成衛內明
福門外南衙及諸門者賜物十段左右羽林及東宮北
門厨供膳及匠准例各賜物十段正月量追三衛細引監門
細引直長飛騎雜技飛騎各賜物十段東宮北門官及三衛
細引監門直長各賜物二十段仍類例功夫多少奏聞其
引玉冊及舉冊讀冊等官人各賜物五十段授冊使人
賜物一百段書冊人各賜物十段其舉腰舉官人賜物
二十段飛騎各賜物十五段其舉香燈三衛及舉寶人

各賜二十段頃者戶口逃亡良田差科繁劇非軍國切要者並量事停減若要和市和雇先依時價付錢自非省支勒索不得輒有進送諸貢物皆須任土當處無者不得別求仍於常數每事量減緣百姓間所有不穩便者並委州府具狀奏聞朕當親覽即為釐革天下百姓並免今年租及地稅自今以後租庸准符配定更不須徵折腳價錢其已前未徵得者亦即免放天下宗姓並准舊式房州百姓宜給復三年其諸司官員并雜色役

掌幕士門役之徒兼音聲人及工匠等非灼然要籍並量事減省所司速為條制廐馬數多皆須秣飼食人之粟曷滋深廣殿中諸閑廐馬量支留以外抽送外州馬坊及本監牧其東宮諸王公主等馬應官供者亦令隨事減省奢侈伎巧實為蠹弊皆因節日宗屬婚親王公妃主競相賀遺或造珍麗妄為進奉錦綵異飾雕鏤奇文假撰樓臺偽裝禽獸諸如此類深是害時宜明勅格嚴加禁斷衣服采章一准令式夫鄒纓齊服尚

且變俗移風朕率先百僚必期化成兆庶東都正月當上
番兵年至五十五即放出前赦及今制處分有不盡者
並令所司類例續奏布告遐邇咸使知聞主者施行

神龍

元年二
月五日

睿宗即位赦

門下朕聞自古帝王光膺圖籙則尊尊親親之義著於
典制朕諒在至公益非獲已我大唐乘時撫運累聖重
光當四海之樂推受三靈之眷命大行皇帝奄弃寓縣

痛結仇讎朕志掃巨逆保寧嗣主今皇帝哀輓在疚託
於朕躬懇懇再三願成茲意朕以不德猥承丕緒念今
追昔載感於懷若涉大川罔知攸濟思荷宗祧之業屬
此維新式揚渙汗之恩與之更始可大赦天下

明皇即位赦

朕承累聖之鴻源荷重光之積慶昔因多難時屬遘屯
寶位深墜地之危神器有綴旒之懼事殷家國義感神
祇吟嘯風雲恭行雷電致君親於堯舜濟黔首於休和

遂以孟秋允昇儲貳旋承內禪繼體宸居拜手之請空
勤讓王之誠莫展恭臨億兆二載於茲上稟聖謨下凝
庶績八荒同軌瀛海無波不謂姦慝潛謀蕭牆竊發逆
賊竇懷貞等並以庸妄擢在朝廷毫髮之效未申丘山
之繫仍積共成梟獍將肆姦回太上皇聖斷宏通英謀
獨運命朕率岐王範薛王業等躬事誅鋤齊斧一麾凶
渠盡殪太陽朗耀闢氛靄於天衢高風順時彰肅殺於
秋序人靈叶贊夷夏相歡四族之慝既清七百之祚方

永爰承後命載闢休期揔軍國之大猷施雲雨之鴻澤
承乾之道既光被於無垠作解之恩思式覃於品物當
與億兆同此惟新可大赦天下大辟罪已下咸赦除之
卯王守禮加實封二千戶宋王成器申王成義各加實
封一千戶岐王範薛王業各加一階内外官人被諸道
按察使及御史所通惡狀咸宜洗滌選日依資叙用

先天

二年
七月

肅宗即位赦

朕聞聖人畏天命帝者奉天時知皇靈眷命不敢違而
去之知歷數有歸不獲已而當之在昔帝王靡不由斯
而有天下也乃者安賊亂常京闕失守天未悔禍羣克
尚扇聖皇久厭大位思傳眇身軍興之初已有成命予
恐不德罔敢祇承今羣工卿士僉曰孝莫大於繼德功
莫大於中興朕所以治兵朔陞將殄逆寇務以大者本
其孝乎須安兆庶之心敬順羣臣之請乃以七月癸丑
朔十二日甲子即皇帝位於靈州敬崇徽號上尊聖皇

曰上皇天帝所司擇日昭告於上帝朕以薄德謬膺重任既荷承天之禮宜覃率土之澤可大赦天下改元曰至德大辟罪已下常赦所不免者咸赦除之其逆賊李林甫王珙楊國忠近親合累者不在免限百姓官吏能率親屬去逆歸順有官加優獎斬得逆賊父子不問首從當賜爵土別有褒崇其有直言極諫才堪牧宰文詞博達武藝絕倫孝悌力田沉淪草澤委所在長官聞薦詣闕自陳者亦聽東宮官屬既會昌期合承寵命量加

改轉諸色勾徵逋租懸調及官錢在百姓腹內並宜放免
靈州改為靈武大都督府上縣為望中縣為上官寮等
一切便授天下耆壽各賜物五段侍老版授太守縣令
有差各賜物五段天下諸道百姓本道採訪使差郡縣
官存問四方將士各賜馬一匹六品以下賜物十段天
下寺觀各度七人太守並限三考然後轉御史取曾任
郡縣理人官者後可薦用所有彈奏一依貞觀故事官
吏犯枉法贓終身勿齒自古聖帝明王忠臣烈士五岳四瀆

名山大川並令所在致祭孝子順孫義夫節婦旌表門閭内外文武官九品以上各加兩階賜勲兩轉三品以上賜爵一級

代宗即位赦

高宗嗣興諒陰成受終之禮康王承統翌日奉顧命之書况萬事尚殷蕭牆有釁蒼生佇理社稷謀安教雖達于通喪禮有變於金革順人聽政俚俛從權朕頃侍鑾輿率彼西夏佐成草昧俾掌戎車國步艱難睿圖廣運

再清寓縣重復宗社稟成命以受律敢貪天以為功聖
慈弘深冊踐明兩奉若廷訓敢有怠心嗚呼不吊昊天
殃咎荐至皇祖之哀未釋窮崩之罰奄鍾攀號罔極若
無天地誓終喪紀企及前王百辟抑予俾恭遺訓俯遂
衆望嗣膺丕烈欽茲大寶懼不勝任若蹈春冰如集喬
木日者先聖哀損朕在問安而閱牆構災凌長成禍閭
闈作孽閤寺滔天職為亂階潛置巫蠱將行竊弄覆我
邦家賴良弼匡戴爪牙同德天道助順神理害盈昭此

共工之心終貽管蔡之辱舍彼有罪咸服其辜廢於離
宮寘於城穎今天衢雖泰率土未康式協公卿之心仰
遵易月之命奉時斯在先甲未孚宜允人神覃茲渙汗
可大赦天下自寶應元年五月十九日昧爽已前大辟
罪已下已發覺未發覺已結正未結正繫囚見徒常赦
所不免者罪無輕重咸赦除之自開元已來所有諸色
犯累者並宜雪免左降官并諸色流人及罰鎮效配軍
團人等一切即放還其中有見任刺史縣令及正員者

並依本任其四月十五日已後諸色流貶者與量移近處逆賊史朝義已下有能投降及率衆歸附者當超與封賞天下禁囚不得過五日所有推劾不得分外拷掠亦不得信支證便結罪名諸色文武官應在凌霄門內謁見者并飛龍射生等並宜以實應功臣為名諸州刺史與一子官刺史縣令入五品減兩考内外文武官三品以上賜爵一級四品以下各加一階諸州刺史父母在無官者與致仕官及父母邑號已亡歿者追贈諸州防

禦使並停天下子為後者各賜勲一轉州縣官自今已
後宜令三考一替太官饗饌等特宜減省有涉奢侈一
切宜停天下百姓逋租懸調貸糧種子諸色欠負官物
一切放免開元乾元等錢並宜準一文用不須計以虛
數益昌郡王邈進封鄭王延慶郡王迥進封韓王故庶
人皇后王氏故庶人太子瑛郢王瑶光王琚宜並復封
棣王琰永王璘及應安祿山誑誤反狀等並宜昭雪建
昌王追封齊王崇恩王追封衛王靈昌王追封鄆王其

有明於政理博綜典墳文可經邦謀能制勝及孝悌力
田諸州刺史並宜搜揚聞薦投匭者不須勘以停處姓
名務招直言以副朕意

順宗即位赦

朕纂承天序嗣守鴻業以不敏不明託於萬國兆人之
上永惟高祖太宗肇造區夏列聖休德洽於人心肆惟
寡昧膺受多福大懼不克負荷為宗廟羞若涉大川罔
知攸濟思與羣公卿士方伯連帥祇若丕訓惟懷永圖

內熙庶績外弘至化以弼予理臻於大中俾懷生之類
各遂其性咸得自新導迎休和蕩滌瑕累可大赦天下
自貞元二十一年二月二十四日昧爽已前大辟罪已
下罪無輕重已發覺未發覺已結正未結正見繫囚徒
常赦所不原者咸赦除之左降官量移近處如復資者
任依常調選如有親故在上都任於所司陳狀便與處分
別勅責受降資正員官者亦與追改亡官失爵放歸不著
量加收叙流人放還僧尼道士移隸者罪人已亡歿家

口未許歸者一切放歸如自情願住者勿抑令歸如先
有勅云縱逢恩赦不在放還限者及別勅安置者並宜
放還其安置人五品已上奏待進止左降官及流人亡歿
有官者各還本官今日已前痕累禁錮及反逆緣坐者
一切並與洗滌應緣山陵制度及喪儀禮物博詢可否
務遵禮度必誠必信副朕衷懷橋道置頓並以内庫錢
充諸有費用先給工價仍以見錢及不折物不得輒令
料配天下百姓應欠貞元二十一年二月三十日已前

權酒及兩稅錢物諸色逋懸一物已上一切放免京畿
諸縣州應今年秋夏青苗錢並宜放免天下諸州府應
須夫役車牛驢馬腳價之類並以兩稅自備不得別有
科配仍並以兩稅元勅處分仍永為恒式不得擅有諸
色權稅常貢外不得別進錢物金銀器皿奇紋異飾彫文
刻鏤之類若已發在路者並納左藏庫清淨者理國之
本恭儉者修己之端朕臨御萬方方弘此道苟可濟物
予何愛焉宮掖之中宜先省約其後宮細人子弟音聲

人等並宜放歸親族應緣官市並出正文帖仍依時價
買賣不得侵擾百姓所緣諸官要嫁母並取食糧戶充
稅不得科配寺觀諸軍先擒吐蕃生口配在諸處者宜
資給還本國天下官吏應行鞭撻本罪不至死者假以
責情致令殞斃每念及此良增惻然宜切加察訪內外
文武見任及致仕官并諸道將士等賜爵加階賜勲有差
二王三恪褒聖侯各與一子官大長公主嗣王各與一
子官及出身有差宗子中有才用者委宗正卿以名聞

量才敘用皇王等已上親賜爵加階有差陪位者年十五已上並放出身武德以來配饗功臣張巡許遠南霽雲顏杲卿顏真卿等各子孫中與一人正員官故尚父子儀贈太師晟太尉秀實子孫中各與一人正員五品官及諸州府長官及京常叅官父見在未官者並與五品致仕官及階父歿母存者與邑號父母亡歿量與追贈陝州元從寶應功臣興元元從奉天定難功臣賜爵勲有差亡歿者與追贈中書門下節度使東都留守度支鹽

鐵等使京兆尹觀察招討等使及神策神威金吾六軍將軍大將軍英武威遠鎮國軍使隴右經略軍使節度留後各與一子官有差其神策神威六軍英武軍等使並與加官神策神威六軍英武威遠營左右金吾及皇城將士及緣御樓立仗將士等賜物及爵階有差應東宮官及侍讀侍書教授在正月二十六日以前者國已闕職掌行事及冊命官受顧命撰制詔及修冊文并寫制詔官等賜爵加階勲進改有差蕃客等共賜物一千八百四十五匹義武軍節度下

官健在城立仗共賜物三千八百四十五匹立仗將士等量
加改轉內侍省及內坊官正諸道進奏院及奏事官賜
爵勲階有差內外五品以上文官及臺省常參官宜至
四考滿與轉中外遞遷量才敘用其中政績尤異須甄
升者不在此限常參官及諸州刺史有先得替及假百
日經喪去官未授官者並即與進擬百司及在城諸使
息利本錢糧徵放多年積成深弊內外官科錢職田等
厚薄不均兩稅及諸色權稅錢物重輕須有損益並宜委中

書門下與所司商量其利害條件以聞不得擅開糴禁錢
務令通濟諸色人中有才識兼茂明於體用者經術精深
可為師法者達於吏治可使從政者宜委常叅官各舉
所知其在外者長吏精加訪擇具以名聞仍優禮發遣
朕當詢事考言審其才實如無人論薦者即任自詣闕
廷内外官及諸色人任上封事極言時政得失才有可
觀別當甄獎百姓九十以上版授及賜各有差仍令官
吏就家存問順孫孝子義夫節婦旌表門閭重加優恤

穆宗即位赦

著大明者日也出乎震而見乎離則八紘開朗萬象昭
煥渙大號者風也發厚地而鼓羣動則氛蒙盪滌鬱伏
舒散王者如日之照臨故聖功作而庶類覩如風之號
令故德音降而兆人從朕以寡薄方茲嗣服荷天地之
眷祐承祖祧之祚運夙夜祗勵懼不克周永惟風教之
流弊眊俗之疾苦思布濟時之政宜弘利物之澤庶有
以導迎和氣感茲歡心宜申在宥之恩用啟自新之路

可大赦天下自元和十五年二月五日昧爽已前大辟
罪已下罪無輕重咸赦除之唯官典犯贓及故殺人者
不在免限左降官量移近處已經量移者更與量移如
復資者即任依常調選責授降資正員官者亦與追改
亡官失爵不齒者量加收敘流人及僧尼道士移隸者
節級放還及移近處諸色得罪人中如有先勅去縱逢
恩赦不在放還限者並與量移若曾任五品已上官者奏
特進止左降官及流人先有官者如已亡歿各還本官

自今日已前曾有痕累禁錮等一切並與洗滌永懷
罔極弓劍不留號奉終天用深哀感應緣山陵制度及
喪儀禮物宜委中書門下及諸司長官等博詢故實務
遵禮度必誠必信副朕哀懷所緣山陵造作及橋道置
頓所須並以内庫錢充不得輒令科配百姓度支諸州
府監院從貞元八年已後至元和十年已前共計欠錢
壹百萬伍千玖百餘貫鹽鈔使諸監院應欠元和十三
年已前錢物除准前制䟽理外共計一百八萬八千六

百餘貫石等戶部諸州府從建中三年已後至元和十三年
已前應欠在州貧窮并遭水旱逃亡百姓腹內兼連接淮西
河南賊界并燒劫散失及貸百姓錢物五十萬九百餘貫石
等京兆府從元和五年已後至十三年已前應欠諸色物共肆
十一萬九千六百餘貫石闕東等州府監院百姓欠負但在官
典所由腹內者一切放免諸州府除京兆河南府外應有官庄
宅鋪店碾磴茶菜園鹽畦車坊等宜割屬所管州府諸道
除邊軍營田處其軍糧既出其正稅米分給其所管營田自

為軍中資用不合取百姓營田并以瘠薄地迴授百姓濃肥地
其軍中如要營田任取食糧健兒不得輒妄招名天下百姓等
自屬艱難棄其鄉井戶部版籍虛繫姓名建中元年已
來改革舊制悉歸兩漢税法久則姦弊濫生自今已後
宜准例三年一定兩稅非論土著俗居但據資產差率
其擇刺史縣令宜委門下中書尚書省御史臺官有所
諳知即具聞奏如賊污殘人當坐舉主權稅之法雖合
同遵瘡痍之餘姑欲寬假其河北鹽宜委度支與權鹽

使審細商量具條流聞奏內外百官食料錢一倍至五
倍以上節級放免仍每經十年即內外百司各賜錢一
萬貫充本各據司額大小公事閒劇及當司貧富作等
第給付應屬諸軍諸使諸司人等在村鄉及坊市店鋪經
紀者宜與百姓一例差科不得妄有影占如有違越所
司具所屬司并人名具奏如聞度支鹽鈇鹽院等所
在影占富商高戶庇入院司不伏州縣差科疲人偏苦
事轉不濟如有此色仰當日勒歸州縣諸道除正勅率

稅外不得妄托進奉擅有諸色權率天下州府除兩稅
合送上都錢物及所司常貢外輒不得別進錢物并方
鎮得替後至城亦不得輒有進獻掖庭籍沒罪人妻女
等宜放歸親族其諸軍先擒獲吐蕃生口配在諸處者並
放歸本國願住者亦聽内外文武見任致仕官三品已
上賜爵一級四品以下加一階諸軍將士等普恩之外
賜階爵有差二王三恪文宣王及公主縣主嗣王節級
賜與一子官及出身宗子有才行者悉以名聞奏仍委

中書門下量才敘用皇^調五等已上親皇太后二等已上親並賜階爵武德已來配饗及第一等功臣并張巡許遠南霽雲顏杲卿顏真卿等尚父子儀贈太師晟贈太尉秀實子孫中與一子官有差其中有才行堪任臺省者量才敘用中書門下并諸道節度使諸州府長官東都留守及京常叅官諸軍使等父母祖父祖母並節級與追贈父母存者與官封已經追贈者更與改贈興元奉天功臣及蔡鄆立功將士普恩之外更賜勲爵亡

歿者與追贈中書門下及節度等使東都留守度支鹽鐵京兆尹諸州刺史等賜一子官有差在城諸軍將士節級賞賜仍加階爵京西京北及振武天德八道節度及都防禦使下神策一十二鎮將士等共一十八萬六千七百餘人都賜物一百八萬一千八百餘匹東宮官及侍讀普恩之外賜爵加階仍並與進改自國哀及行使命職事官普恩之外賜階爵及勲其受顧命撰制詔及冊文并寫制言官等特加一階賜爵一級并賜上柱國優

與進改書冊官特加一階尊親之禮既展於徽章廣愛之恩宜申其慶賜皇太后諸親委中書門下量第等節級優賞文武常叅官及外官職事五品已上有母者並加邑號如已至郡太夫人國太夫人者許迴授周親緣皇太后冊禮職事官並節級賜物天下百姓有父母高年者賜粟皇城內蕃客等並節級賜物今年正月二十八日至閏正月三日宮苑諸門子守捉西內立仗將士等量加改轉應內侍省及內坊宮正等並賜勲爵常叅

官及諸州刺史少尹赤令有先得替因病假滿百日解
官并終制未授官者及致仕官並與進擬天下諸道州
不得擅有閑糴禁錢務令通濟内外文武官及諸色人
等任上封事極言時政得失才有可觀別當甄獎應流
外色役人等賜勲有差

敬宗即位優賜諸軍詔

朕以寡昧祗膺寶位載懷悼懼豈所克堪而羽衛爪牙
禁營司旅晝巡夜警叶力悉心自始銜哀至於踐阼忠

勤匪懈誠節用彰將圖錫賚務欲豐厚屬頻年旱歉御
府空虛如聞邊上將士至今未給衣賜永言遐慮深切
寤寐霑卹之時所期切濟兩軍官健各宜賜綵十匹錢
十千畿內諸鎮各賜絹十匹錢五千軍吏及城內諸軍
賞物節級有等仍於內庫更出綵絹共二百萬匹付度
支充邊軍春衣并天下州府賦稅如要蠲放者並委所
司約此數均融取濟凡百將士宜悉朕懷長慶四年正
月

唐大詔令集卷二

欽定四庫全書

唐大詔令集卷三

宋 宋敏求 編

帝王

即位赦下

武宗即位赦

宣宗即位赦

懿宗即位赦

改元上

改元貞觀詔

改元總章詔

改元弘道詔

改元光宅詔

即位赦下

武宗即位赦

朕粵自蕃邸來握乾符銜哀受遺當寧興感永惟我高

祖太宗艱難創業其後列聖奕葉重光英睿相繼逮於
先帝秉文之德光闡皇猷將洽理平甫臻仁壽顧予冲
昧叨承大統祇命若臨於泉谷思理未詳於政刑空懷
濟物之心將績已成之業所尚者節儉所寶者忠良肆
眚法解網之仁厚生敷流澤之惠上憑靈祉下便物情
期中外以叶心冀遐邇而咸乂爰遵典訓特霽鴻恩諒
表政於惟新敢忘憂於馭朽可大赦天下自開成五年
二月八日昧爽已前大辟罪已下罪無輕重咸赦除之

惟十惡叛逆故殺人官典犯賊不在此限

宣宗即位赦

天分四時必始發生之德帝臨九有是先蕩滌之恩故雷雨作而萬物滋榮慶澤行而兆人悅服皇王之典今古所遵朕以眇身獲纂丕業上承宗社之眷祐下繫生靈之安危夙夜祗勤庶臻於理永惟黎元之困賦役之繁干戈未寧輸發尚急流移未復寃滯猶多刑獄未平姦詐斯起進獻無度淫巧競生思思蠲除俾從開泰將

以導迎和氣咸致歡心爰因大慶之晨式舉惟新之令
可大赦天下會昌六年五月

懿宗即位赦

門下朕聞龍之騰天漢也則必乘風雲鼓雷電以濡六
合君之踐大位也則必敷仁惠煥號令以澤萬方是以
地不間於幽遐事罔計於輕重洪聖興而皇渥溥德音
振而庶類蘇故僭咎咸除枯沉盡起斯皆前代令典國
朝成規委轡諒戒於惠姦凝命始懷於布澤顧予寡德

嗣續丕圖夙夜乾惕若俯泉谷永惟我高祖太宗之艱
難締構又惟我列聖之慈儉統承思所以克紹休明弘
濟億兆刻末俗之弊清理化之源啟祥導和應天順物
致驩心於率土和恭己以臨民爰申在宥之恩因洽維
新之慶可大赦天下自大中十三年十月九日昧爽已
前大辟罪無輕重已發覺未發覺已結正未結正及繫
囚見徒常赦所不免者咸赦除之唯犯十惡叛逆及故
殺人官典犯賊及持杖行劫並不在此限其故殺人者

已傷未死，罪重殺傷，偶得免者，並同已殺人法處分。又刑獄之內，官吏用情推斷不平，因成冤獄，無問有賊無賊，不在原免之限。

改元上

改元貞觀詔

詔曰：朕遐觀方冊，歷選前王，大道既隱，至公斯革，莫不思樹風聲，以隆鼎命。太皇膺錄，受圖功成，治定鄙聖人之餘事，顧天下而宵然，永言俗累，高居物表，爰以大寶。

卷三
俯授微躬自肅奉神器亟移仄律屬三正在旦萬國來
庭長世之術既弘惟新之命方始體元居正今則其時
可設武德十年為貞觀元年

改元總章赦

朕以寡薄忝承丕緒奉二聖之遺訓跨億兆以初臨馭
朽兢懷推溝在念而上玄垂祐宗社降休歲稔時和人
殷俗阜車書混一文軌大同檢玉泥金升中告禪百蠻
執贄萬國來庭朝野懽娛華夷胥悅但為郊禋嚴配未

安太室布政敷化猶闕合宮朕所以日昃忘疲中宵
輟寢討論墳籍錯綜羣言採三代之精微探九皇之至
蹟斟酌前載製造明堂棟宇方圓之規雖無古制肆筵
陳俎之法獨運裁成宣諸內外博考詳求度其短長
異長聞見而鴻生碩儒俱稱盡善宜命有司急及時赴
作務從折中稱朕意焉今陽和在辰景風扇物昆蟲草
木咸獲康寧朕之百姓尚多勞止恩覃惠澤與其更新
可大赦天下改乾封二年為總章元年大辟罪已下皆

赦除之

改元弘道詔

朕以寡昧謬膺丕緒未嘗不孜孜訪道戰戰臨人馭朽
懷秋駕之危負重積春冰之懼日慎一日三十四載於今矣
何則足寒傷心人勞傷國下安即上逸時弊即君憂所
以身處九重而情周萬姓建本之懷遽切抑末之念彌
深今雖庶績已寧淳源未洽履素歸厚者遂寂寥而靡
聞徇華趨利者尚馳騫而不息顧以薄德有謝移風永

瞻羣方在予多愧况朕之綿系兆自玄元遠叶先規光
宣道化變率土於壽域濟含生於福林屬想華胥載勞
寤寐所冀內外寮案各竭乃誠敦惟黎民俱崇簡質舊染薄俗咸
與惟新憑大道而開元共普天而更始宜申霈澤廣被
八紘可改永淳二年為弘道元年大赦天下前後責情
流人並放還老人年百歲已上者版授下州刺史婦人
版授郡君九十已上者版授上州司馬婦人版授縣君
八十已上者版授縣令并歸節級量賜粟帛孝子順孫

義夫節婦表其門閭終身勿事鰥寡孤獨篤疾不能自
存者量加賑給仍天下諸州置道士觀上州三所中州
二所下州一所每觀各度七人又比天后事條深有益
於為政言近而意遠事少而功多務令崇用式遵無怠
見任内外官五品已上經四考及守五品經三考六品
已上計滿三考政用清勤狀無私犯者各加一階

改元光宅赦

鸞臺朕聞上皇建極體元氣以育羣生大聖承天法陽

門而陶庶類與時舒卷叶三正而推移隨道污隆應五
幹以通變故能牢籠宇宙埏埴人靈符景運而財成契
休期以光宅昔有隋標季率土淪胥豺狼肆吞噬之災
億兆被虔劉之酷高祖神堯皇帝披圖汾水仗鉞參墟
靡氛祲而安四維掃攬搶而清六合太宗文武聖皇帝
負日月而膺運鼓雷霆之震威蕩海夷山功浹八荒之
外救災拯溺仁霑萬域之表樂和禮洽天平地成茂績
光於邃初鴻名冠於開闢高宗天皇大帝雲房誕睿虹

渚降靈受祿錯之禎符應朱紼之景命飛車乘毳臣軒
項之不臣沒羽浮金服禹湯之未服所以開邊服遠更
闡寓於先基富貴寧人重增輝於前烈撫璇當宁調五
氣於明堂考瑞升中朝百神於日觀茫茫衆俗寧觀覆
燾之恩蠢蠢庶氓孰辨陶甄之力固已千年啟旦三聖
重光厯選前書無聞往載豈謂道隆金鏡運迫鼎湖方
延翠渚之祥遽託白雲之駕以社稷之大任屬荒眇之
微躬欽奉遺言載深悲懼遂以茲菲德開導嗣王式綜

萬幾載宣風化所賴王公卿士各竭乃誠若濟巨川實
資舟楫然自恭臨朝序已積炎涼教靡致於移風道尚
慚於變俗良以哀迷在疚荼棘纏心陵廟未安匪皇專
慮今者鳳京遙踐龍馭上升既因大禮之終宜更中區
之始朕居臨赤縣求瘼之志每盈子育蒼生恤隱之懷
鎮切惟欲勵精為政克己化人使宗社有北辰之安區
寓致南風之泰以斯酬眷命用此報先恩冀上不負於
尊靈下微申於至懇夫五行遞用列代相承欲崇其德

先遵所尚故夏以金運乘驪而尚玄周以火行貴駢而尚赤將隆母德必欲子扶近者地不藏珍山無秘寶皇家土德勝氣彌彰宜從白賁之象以輔黃中之運自今已後旗幟皆從金色仍飾之以紫畫以雜文其應合改者所司詳依典故供奉帷幙咸用紫色自錄府衛所旗並改以皂八品已下舊服青者並改以碧其在京諸司文官職事五品已上清官并六品七品清官並每日入朝之時常服袴褶諸州縣長官在公衙亦准此自餘官

朔望朝參懷舊其色皆依本品又鎮星之在太微已歷
年載著土清之美應表坤祚之元符宜同感帝以時薦
享又東都改為神都宮名太嚳但列署分司各因時而
立號建官置職咸適事以標名而今曹僚之中稱謂多
與宜改尚書省為文昌臺左僕射為文昌左相右僕射
為文昌右相吏部尚書為天官尚書戶部尚書為地官
尚書禮部尚書為春官尚書兵部尚書為夏官尚書刑
部尚書為秋官尚書工部尚書為冬官尚書門下省改

為鸞臺中書省改為鳳閣侍中改為納言中書令改為
內史太常寺改為司禮寺鴻臚寺改為司賓寺宗正寺
改為司屬寺光祿寺改為司膳寺太府寺改為司府寺
太僕寺改為司僕寺衛尉寺改為司衛寺大理寺改為
司刑寺司農寺依舊左右衛亦依舊左右驍衛亦為左
右武衛左右武衛為左右威衛為左右豹韜衛
左右領軍衛為左右玉鈴衛左右金吾衛依舊其餘曹
司及官僚名未改者所司速制名奏聞又司隸之官監

郡之職所以巡省風俗刺舉愆違今人物殷煩區宇遐
曠而所在州縣未能澄肅可置右肅政御史臺司其職
員一准御史臺專知諸州按察其舊御史臺改左肅政
御史臺專知在京有司及監諸軍旅并出使其諸州錄
事叅軍宜依舊令在京五品已上清官每日章善顯福
等門各一人待詔朕當親訪政道詳求得失又玄元帝
者皇室之源韞道德而無為冠靈仙而不測業光衆妙
仁覃庶品豈使寶允見御宸居先母竟無尊位可上尊號

曰先天太后宜於老君廟所敬立尊像以申誠薦又洛州界內所有帝王之陵及自古清直之臣忠廉之佐並令州縣就其塋域一申祭享又自武德已來元勲佐命或以忠鯁事主或以道德臣君非身在有犯緣子孫絕封者前詔雖已處分或恐仍有闕遺宜降霈澤重申前命又往日先朝聖武蕩定遐方日月照臨咸為郡縣皆荷生成之惠無復遠近之殊朕矜撫之懷豈隔中外每念其殄嗣愍愴良深繼絕興亡實惟本志各宜求其後胤

立之以承享獻其諸都護漢官及鎮兵等並悉放還其營奉山陵褒鹵簿使等並依別勅處分又兩京之所徭賦實繁亦令所司作優量法使勞逸得所靈駕所涉千里斯遙在路黎民莫不哀奉念其勞敝情增感惻其緣供頓及山陵者並免今年課稅又比來諸道軍行叙勲多濫或端居不出以貨買勲真偽相蒙深為巨蠹自今以後所司宜明具條例務令禁斷責成斯在可不勉歟如更有違必越法科處分比來放出宮女已降詔書然

以在內多時咸悉願住但念其各有親屬豈可久致分離宜准前恩即令放出又隆平日久戶口滋多物務既煩欺隱斯衆其上州三萬戶已上大縣萬戶已上各宜析出別置州縣惟雍洛二州不在此限又濟時之道求賢是務其官人及百姓等或器標瑚璉材堪棟幹或在職清慎或抱德幽棲或武藝馳聲或文藻流譽宜令京官九品已上諸州長官各舉一人咸以名薦務取得賢之實無貽濫收之譏又前者有詔具述內外官寮備陳

行事以申勸沮但恐百官在職尚有虧違今欲重降深恩更垂寬宥棄瑕錄用罔責於前非滌罪論功必期於後善若又不悛已過重掛踈羅當使置以嚴刑倍加其罰思與士庶共此維新可大赦天下改文明元年為光宅元年自九月五日昧爽已前大辟罪已下罪無輕重已發覺未發覺已結正未結正繫囚見徒皆赦除之流人未達前所者放還其犯十惡官人枉法受財監臨主守自盜所監臨劫賊殺人故殺人謀殺人反逆緣坐并軍

將臨戎挫威喪律鎮遏失所虧損師徒及常赦所不免者並不在赦例亡官失爵量加收叙諸年八十以上各賜粟貳石綿帛二段九十以上賜粟三石綿帛三段百歲已上賜粟五石綿帛五段並依舊例版授孝子順孫義夫節婦咸表門閭鰥寡惇獨篤疾之徒不能自存者並加賑恤亡命山澤挾藏軍器百日不首復罪如初敢以赦前事相告言者以其罪罪之布告天下咸使聞知其詔書內事有未盡者仍令所司作條例處分

欽定四庫全書

唐大詔令集

唐大詔令集卷三

欽定四庫全書

唐大詔令集卷四

宋 宋敏求 編

帝王

改元中

改元載初赦

改元開元赦

改元天寶赦

改天寶三年為載制

改元上元赦

去上元年號赦

改元永泰赦

改元大厯赦

改元中

改元載初赦

朕聞元皇纂厯則天地以裁規大聖握圖法陰陽以施

化故能牢籠品類陶鑄生靈敷景運於休期闡宏基於
光宅有隋失馭率土分崩赤縣為禾黍之場蒼生遇塗
炭之酷我高祖神堯皇帝龍興汾晉鳳起寰區除梟獍
而安八荒剪鯨鯢而清四海太宗文武聖皇帝膺昊穹
之歷數鼓雷電之雄威服遠冠巢燧之前開邊越羲農
之際鴻名邁於三五茂績隆於往初高宗天皇帝稟
雷澤之禎符降天縱之神器湛恩所被匝乾坤覆載之
鄉至化所覃盡舟車所通之境撫璇丹極輯瑞蒼巖天

平地成淳風啟千年之運樂和禮備寶祚隆三聖之基
逖聽王猷馨聞帝載朕以虛薄虔奉睿圖夙懷兢業不
遑寢食幸穹昊貽佑宗社延祥河薦合天之符洛出永
昌之籙時和歲稔遠肅邇安斯皆先德所延屢彰嘉貺
自恭臨億兆已積炎涼尚想希風未臻於至道顧循菲
德媿切於深衷思弘顧托之恩再闡混元之始夫以玄
穹列象三辰所以麗天厚載含章五行於焉紀地易曰
三五以變錯綜其數通其變遂成天下之文極其數遂

定天下之象火水相變其卦為革彖曰天地革而四時成言
五德更相生變革萬物故帝者改政施教明受之於天下定之
於人者也仲尼曰其或繼周者雖百代可知蓋以文質相因
法度相改故矣是以伏羲高陽有周皆以建子之月為正神
農少昊陶唐有殷皆以建丑之月為正軒轅高辛夏后漢氏
皆以建寅之月為正後雖百代皆可知者以此雖遭遇不同
步驟殊致未有不表明軌物以章靈命之符者也我國家
創業有意乎改正朔矣所未改者蓋有由焉高祖草創百度

因循隋氏太宗緯地經天日不暇給高宗嗣位將弘丕訓改作之事屢發聖謦言猶在耳永懷無及自五帝續統三王馭宇或父子相承同體異德或金木迭改應天順人故納麓登庸粵受終於文祖干戈革命必理厯於明時然則開元配永肇自陽來之旦統厯履端基於朔易之首孳萌發內氣律由中品物任而昭蘇生類蕩而敷草是知夏之人統不逮殷之地正殷之地正有殊周之天統元命所苞實在茲矣周公稽古制禮於成王之日漢高握德改元於武皇之代則

知文物大備未遑於上業損益之道諒屬於中平朕所以式
遵禮經奉成先志今推三統之次國家得天統當以建子月
為正考之羣藝厥義明矣宜以永昌元年十有一月為載初
元年正月十有二月改臘月來年正月改為一月自載初
元年正月一日子時已前大辟罪已下罪無輕重已發
覺未發覺已結正未結正繫囚見徒皆赦除之其叛逆
緣及子孫殺祖父母父母部曲容女奴婢殺主不在赦
限其與敬業虺冲并諸虺友或有往還其魁首已伏誅

其支黨事未發者並特從原免不得更相告言內外見任文武九品以上職事官並賜右爵之級天下百歲以上老人版授下州刺史米粟五石帛十段九十以上版授上州司馬米粟四石帛七段八十以上版授縣令逋租懸調并丁夫雜匠衛士及有番地等違番及逃走應陪番及徵課調者並特宜免放其欠負官物及盜詐三庫物並不在赦限鰥寡孤獨篤疾等不能存立者量加賑恤孝子順孫義夫節婦旌表門閭終身勿事天下百姓年

二十一身為戶頭者各賜右爵之級女子百戶賜以牛
酒明堂役工人未被恩者付司郎類例定等級奏聞十
五日內使了緣供明堂致死人其有未霑勲賜者亦宜
准例酬給今年麥不熟處及遭霜滯之處並量放庸課
州縣好加檢校勿使飢饉新年宣差科百姓稍有辛苦
亦宜量加優恤蠲其徭役所司類例處分供象州軍百
姓艱辛處未得復者宜給復一年洛州軍殺徭役繁多
代朔并忻等州行軍及諸州供明堂木及銅處所司各

類例節級給復皇親諸陪位未出身者量材處分已出身者賜勲一轉富商大賈衣服過制喪葬奢侈損廢生業州縣相知捉搦兩京兼委金吾檢校天下百姓皆須嫁娶以時勿使外有曠夫內有寡女戰亡人格外贈勲兩轉迴授暮親孀孤惇者州縣給糧安養征鎮人家口州縣存恤勸課殷有之家助其營種勿使外人侵欺仍令所司判定正禮樂剛定律令格式不便於時者內外官五品已上各舉所知九經文字集學士詳正革其訛舛

亡官失爵量加叙錄長流人移別勅流人移貫人降授
官人反役緣逆人用當及造罪過特處分者雖未至前
所並不在赦限西府功臣及晉府子孫屈滯者量加收
叙所司奏聞亡命山澤挾藏軍器冒濫復罪如初敢以
赦前事相告言者以其罪罪之率土之內賜酺三日赦
書日行五百里朕又聞之人必有名者所以吐情自紀
尊事天人是故以甲以乙成湯為子孫之制有類有象
申繻明德義之由朕今懷柔百神對揚上帝三靈眷祐

萬國來庭膏土名之典式敷行政之躅宜朕以聖爲名
自卦演龍圖文開鳥跡萬人以察百工以乂所以弘敷
政道宣明禮樂指事會意改易異塗轉注像形屈伸殊
制周宣博雅史籀興古篆之文尼父溫良丘明述春秋
之傳自諸侯力爭姬室寢微離為二周分成七國法律
異令田疇異畝言語異聲衣冠異制秦兼天下刻滅古
文隸卒屢興兵車歲動官獄繁騫爰創隸書自著秦文
肇興八體刻符兼於大篆摹印逮於爰書兩漢因之九

千餘字張敞杜鄴講學於前楊雄甄豐校理於後魏晉
以降代之名儒穿鑿多門形聲轉繆結造新字附會其
情古今訛舛稍益繁布書畫無端平之體魚鳥增奔放
之容轉相攸效日滋月甚遂使後生學徒罔知所據先
王載籍從此湮沉言念澆漓情深憫悼思返上皇之化
佇移季葉之風但習俗多時良難頓改特創制十二
字率先百辟上有依於古體下有改於新文庶保可久
之基方表還淳之意昔在包犧開木德之運軒轅應土

行之序循環終始布在方冊莫不績著帝猷功宣皇道
方列三微之統乃膺五行之厯雖則盛比共工強踰羸
政齊桓晉文之業大彭豕韋之美纔為霸者豈登帝錄
自炎精蕩覆王風哀思漢氏蒙塵中原離析當塗逆取
但肆兵威典午專權無聞德化故三國鼎峙五胡幅裂
或道乖嗣德或業匪孫謀良由取之不以樂推失之在乎
虐用者也及齊梁竊據僻在江淮周魏勃興奄宅咸洛
雖變夷從夏號令惟行於境內而智小謀大聲教不通

於天下隋之御極陳氏猶存開皇之中纔聞混一嗣主
失道俄至分崩七八年間生人泯絕秦項之酷猶未之
半開闢已來蓋未之有我國家祖宗積德文武重光仁
風被於四表英猷冠於三代易不云乎天地之道變而
不易者也仲尼曰善人爲邦百年可以勝殘去殺則知
聖王久於其道而天下歲矣自魏至隋年將四百稱皇
僭帝數十餘家莫不廢王道而立私權先詐力而後仁
義勲未踰於列國德不漸於霸圖雖復時合諸侯一匡

區域而晉武踐祚茂烈多慚於水官隋帝垂時雄圖不
逮於秦氏惟彼二君閏位況區區者豈宜當三統之數
者乎朕逖聽皇綱幽求帝典定王伯之真偽洗生人之
耳目庶叶三推之美光宣五帝之次况當布政景化維
新太初開厯上元伊始宜以發揮大寶申明厯數恢皇
家正土之符繼炎劉真火之序摘之罔極垂之無窮以
周漢之後為二王仍封舜禹成湯之裔為三恪有司求
其苗裔即加封建其周隋宜同列國其嗣使祭焉布告

遐邇咸知朕意主者施行

改元開元元年大赦天下制

蘇頌

黃門聖人無心同於吹萬上皇有道契於明一居天下之尊者莫大體其大以照臨成天下之務者至公順其公以康濟故能稽昌厯考元符通於神祇格於上下鴻名不可以深拒盛典不可以固違斯豈在予而徇於物也朕以菲德丕承聖訓掃除機槍保衛宗稷內問安以承志外聽理以推誠始自朝廷納之以軌物加於蠻貊洎

之聲教欲令跂行喙飲含齒戴髮去其天札蠲其疵厲
每兢兢於紫座寧自貴於黃屋而凡我羣辟顧斯兆庶
以為人謀協從天意欽若王者人所歸也帝者天之號
也歸之者以德號之者以功然號以功成則功不可以
不表歸以德厚則德不可以不勵朕猥屬與能之運遂
忘冲讓之私將逮建寅之歲首甫釋建子之天統是用
發揮景命受茲禮冊夫循名者責實謀始者慮終勉而
全之非敢自滿所以克己思政惟懷永圖懼弗勝荷用

多慙惕赦令所作其來尚矣是則奸人之幸嘗思奔馬之喻朕但欲令其畏惡化之為善庶比屋可封豈開羅為惠朕之此志每用形言自昨冬序頗愆農澤洎簡辰揀日有司備禮則上天同雲北風雨雪意者將乘廣慶必得湛恩宜憑宥過之典以叶隨時之義可大赦天下改先天二年為開元元年自開元元年十二月一日昧爽以前大辟罪已下已發覺未發覺已結正未結正繫囚見徒咸赦除之云云禮尚於儉書戒於奢朕方歸敦

朴以存勸沮至於乘輿服御及土木之功蠲除樽節貴
從簡省王公已下宜識此心將欲先自朕躬冀能化行
海內薛伯陽以凶魁之子合寘嚴刑緣尚主之恩特令
遠貶旋念從夫之禮深矜自我之出宜復舊婚再承新
命可唐州別駕員外置同正員郭元振往立大功保護
於朕頃因閔武頗失軍容責情放逐將收後効可饒州
司馬員外置同正員朕聞罪不相及先王之制叔向豈
坐於凶弟展禽見稱於哲兄劉廙不以劉偉獲辜王導

不以王敦廢職崔滌為其兄湜構禍每進款誠事朕有
年心則無隱忠邪既判賞罰宜均俾踐儲卿式彰臣節
可太子僕員外置同正員國初以來宰相及實封功臣
子孫一房沈翳未承恩者令所司訪擇有才用者量加
擢用周朝酷吏來俊臣周興之徒殘害宗枝毒害良善
永言及此深所嘆恨其酷吏有身在及酷吏子孫亦令
所司勘會甄別處分諸軍將士有年歲深久所由要籍
或不得選集及未叙勞効咸委軍將據實奏聞仍令所

司早勘處分及諸軍將佐提管以上自今已後冬正東
帛一准京官例給亡命山澤挾藏軍器百日不首復罪
如初敢以赦前事相告言者以其罪罪之赦書日行五百
里布告遐邇咸使知聞主者施行

改元天寶赦

古先哲王之致理也皆上順天心下稽人事時令贊發
生之德靈符叶紀年之稱考彼前載斯為大猷恭惟烈
祖玄元皇帝天寶錫慶象帝之先垂裕後人重光五聖

自朕嗣守丕業洎三十年實賴宗社降靈昊穹孚祐萬
方無事六府惟修寰宇晏如庶臻於理然則乾元在上
仁覆為首皇王臨下惠化攸先恩弘善貸用廣滋育尊
道寶而建元暢玄風於不宰况屬陽和布氣獻歲發生
宜覃在宥之恩式降惟新之澤可大赦天下改開元三
十年為天寶元年自天寶元年正月一日昧爽已前大
辟罪已下罪無輕重已發覺未發覺已結正未結正繫
囚見徒常赦所不原者咸赦除之諸色左降官并其流

人未經量移者亦與量移禁麇卵以遂生成自今已後每年春天下宜禁弋獵採捕如聞百姓之內或有戶高丁多苟為規避父母見在乃別籍異居宜令州縣勘會其一家之中有十丁以上者放兩丁征行賦役五丁已上者放一丁即令同籍共居以敦風教天下侍老八十已上者宜委州縣官每加存問仍量賜粟帛侍丁者令其養老孝假者矜其在喪此王政優容俾申情禮而官吏不依令式多雜役使自今後不得復然國之急務莫若

求才頃者雖屢搜揚士庶尚慮遺逸更宜精訪以副虛懷其前資及白身人中有儒學博通及文詞秀逸或有軍謀越衆或武藝絕倫者委所在長官具以名薦若乃弘我風化實惟方岳必佇其人以膺共理其京文武官五品以上清資并郎官據資歷人才堪為刺史者各任封狀自舉但文宣垂訓事必正名而黃鉞古來以金為飾金者應五行之數有肅殺之威去金稱黃理或未當其黃鉞宜改為金鉞副威武之義焉内外文武九品已

上各賜勲兩階前王重典在乎祭祀况屬惟新事宜昭告五岳四瀆名山大川諸靈迹及自古帝王忠臣義士並令所司由本州縣致祭

改天寶三年為載制

履端正名義取垂範體元設教在乎變通雖俗革從宜固不稽古朕纘復興運恭守睿圖常恐至化猶微淳風尚薄未臻華胥之俗莫登可封之人故未明求衣日是忘食勵精為理思致雖和厯觀載籍

詳求前制而唐虞齋煥乎可述是用欽若舊典以叶維新
可改天寶三年為三載今春事將興陽和布澤發號施
令之日革故履新之時宜弘在宥之恩以助生成之化
其天下見禁囚徒應雜犯死罪者宜各降一等自餘一
切放免其十惡及造偽妖妄頭首官吏犯賊并姦盜等
害政既深情難容恕不在免限凡諸郡縣仍令太守縣
令勸課農桑先處分太守縣令在任有增減戶口成分
者所由司量為殿最自今已後太守縣令兼能勾當租

庸每載加數分成者特賜以中上考如三載之內皆有成分所司錄奏超資與處分其丁戶仍須按實不得取虛挂之名使親隣代納受其姦弊凡在黎獻實資存恤失生業則流庸不歸每軫於懷深可憐憫諸色當番人應送資課者宜當郡縣具申尚書省勾覆如身至上處勿更抑令納資致使往來辛苦從閏二月至六月已來其當上人中有單貧老弱者委郡縣長官與所由計會便放營農諸軍征鎮及防人有尪羸疾病者委節度

揀擇放歸中外庶寮勉修其職各副朕意宣布遐邇咸

使聞知

正月一日

改元上元赦

自古哲王恭承景命莫不執象以御宇歷時以建元必
當上稽乾符下立人極者也朕承累聖之鴻緒紹大中
之寶位屬蠡孽干紀王師尚勞乾乾之心豈忘鑒昧一
物失所每軫納隍之憂萬邦未寧深懷馭朽之懼賴上
玄垂福宗廟降靈百辟卿士同心戮力方冀干戈載戢

區宇又安常勵躬於帝圖恒取則於天道屬天人叶紀
景象垂文爰遵革故之典將契維新之命義存更始庶
有應於天心澤被無私宜載覃於率土可大赦天下改
乾元三年為上元元年自上元元年閏四月十九日昧
爽已前大辟罪已下已發覺未發覺已結正未結正繫
囚見徒罪無輕重常赦所不免者咸赦除之其與逆賊
元謀及脅從受驅使懼罪而來降并潛藏不出者已頻
處分但能歸順捨罪除元惡之外一無所問其史思明

心能改圖束手來款亦當洗其瑕釁議以勲封内外文武官賜爵各有差其六軍及飛龍閑廐加賜物其成都靈武元從扈從遞加有差在外諸軍各錄賞物陣亡將士優加褒贈行人家口所在賑給定禍亂者必先於武德極生靈者諒在於師貞周武創業克寧區夏惟師尚父實佐興王況德有可師義當禁暴稽諸古昔爰崇典禮其太公望可追封武成王有司依文宣王置廟仍委中書門下擇古今名將同文宣王置亞聖及十哲等享祭

之典自古帝王欽慎刑法蓋以法者人之命刑者國之權苟或失其科條固難措其手足頃或姦臣擅命中興不修造次便行哀矜何在自今已後其有犯極刑者宜命本司依舊三復庶平反之際人謂不寬幽明之間理皆無濫又書稱羣望咸秩詩曰祀事孔明爰自遐代尤崇祭祀朕深維古義必在至誠苟德之不修神亦無據故知精誠有感黍稷非馨而况宋璟發言固三從而可驗漢文深誠為千載之明徵事可遵行理當變革有司

所立秘祝之法或移於歲或移於人君人之心寧所忍也自今已後削去此法其中祀并雜祭祀事一切並停其諸應合祭祀列於恒典所用祭料一依古制務從減省以副朕心又車服以庸有虞盛典威儀以等周禮舊章往屬承平多厯年所下至于公卿列位中外在官多以奢僭為心流弊成俗宜命所司定王公以下車服產業各詳古制及令式作節限聞奏自頃戎車未息殘孽猶虞軍吏獻功務陳首級且四海之內孰非王人豈以

苟從昏迷陷在夷戮一朝授首懸彼藁街朕志存好生
憫其驅脅其諸軍所獲首級除元惡之外一切不須傳
送又設官分理本在安人通遷之政務於利物今寰瀛
之內兵革未清加以時或不登物皆湧貴軍儲是急廩
稍靡供冗官之流固甚勞弊其京閑司官等材堪釐務
者宜命守中書門下即類例量資出授外官王者設教
擇賢以理廣徵巖穴用副薪樵宜令中外五品已上文
武正員官各舉賢良方正直言極諫一人武藝文才俱

堪濟理者亦任狀舉其或文乏詞策武非騎射但權謀
可以集事才力可以臨戎方圓可取亦任通舉並限制
到一月內奏畢自古明王聖帝名山大川並委州縣長
吏擇日致祭義夫節婦孝子順孫旌表門閭終身勿事
去上元年號大赦

為人上者與衆守邦自古哲王懼其滿假聰明睿哲罔
不在躬文武聖神乃以為號顧予菲薄運屬經綸一旅
成師復其舊物聖皇納人壽域遊意道源神器之重傳

歸於朕獲守丕業若履春冰敢忘謙冲日益招損欲垂
範而自我亦去華而就實其乾元大聖光天文武孝感
等尊崇之稱何德以當之以欽若昊天定時成歲春秋
五始義在體元惟以紀年更無潤色至於漢武飾以浮
華非王者之茂典豈永代而為則三代受命正朔皆殊
周宗之王實得天統陽生元氣之本律首黃鐘之尊制
度可行叶用斯在自今已後朕號惟稱皇帝其年但號
元年去上元之號其以今年十一月為天正歲首使建

丑建寅每月以所建為數承天陟禘古臨人必由革故之
源方合大中之道風行寓縣澤被無涯欽上帝之心錫
蒼生之慶可大赦天下自二年九月二十一日昧爽已
前大辟罪無輕重已發覺未發覺已結正未結正見繫
囚徒常赦所不免者咸赦除之其十惡五逆及偽造頭首
官典犯贓法實難容刑故無小並不在免限其吏朝
義若能幡然改圖背逆歸順罪無所問加以勲封自乾
元元年已前開元已來應反逆連累赦慮度限所未該

及者並宜釋放有官者降資與官無官者依本色例收叙
內外官三品已上賜爵一級四品五品各加一階六品
已下賜勲兩轉成都府及靈武元從普恩之外三品已
上更賜爵一級四品五品各加一階六品以下更賜勲一轉
眷及勤勞俾其卓叙每以田功在謹農事惟勤不有司
存何成重穀諸州等各置司田參軍一人令主農事每
縣各置田正二人於當縣揀明閑田種者充務令勸課國
之大事郊祀為先貴其至誠不美多品泰稷雖設猶或

非馨牲牢空多未謂能享今以元玄孚祐至道為心將
臻太和不欲多殺禮樂殊制孝敬同歸圓立方澤任依
恒享宗廟諸祠但臨時獻熟用懷明德之馨庶合西隣
之祭唐虞之代肇有九州王者所都文無異制其京兆
府河南府太原府三京之號宜停其鳳翔先為西京亦
宜準此所設諫曹欲聞諷議允副從繩之望須成削藁
之書其諫官令每月一上封事指陳時政得失若不舉
職事當別有處分其諸州別駕可依舊却置每除京官

五品已上正員清望官及郎官御史諸州刺史皆令推薦一兩人以自代仍具錄行能聞奏觀其所舉以行殿最京文武官等賜物各有差自今已後有隱欺湏勾剝者宜勾當年若事連去年亦在通勾其隔年者不在勾限官典隱贓在腹內不在此例其氏姓雖得之久遠有與格諱及隱疾同聲者宜改與本族望所出大姓自逐穩便名山大川明王聖帝所在廟祠各委州縣長官虔誠致祭其天下侍老先版授者更改與版授未版授者

與版授鰥寡惇獨不能存立者委刺史縣令量加賑恤
義夫節婦孝子順孫旌表門閭終身勿事赦書有所未
及者各令有司速勘會類例條件聞奏

改元永泰赦

叶五紀者建號以體元授四時者布和而順氣天心可
見人欲是從爰立大中之道式授維新之命朕嗣膺下
武獲主多方顧以薄德承茲艱運戎師問罪今已十年
飲至策勲雖凶渠之授首勞師黷武豈人主之用心况

乃軍役屢興干戈靡定茫茫士庶斃於鋒鏑噫皇穹以
朕為子蒼生以朕為父至德不能以被物精誠不能以
動天俾我生靈擠於溝壑非朕之咎誰之過歟朕所以
馭朽縣旌坐而待曙勞懷罪已之念延想安人之策亦
惟羣公卿士百辟庶寮咸聽朕命叶宣乃力履清白之
道還淳素之風率是黎元歸於仁壽君臣一德何以尚
茲廼者刑政不修惠化未洽既盡財力良多抵犯靜惟
哀敬實軫於懷今將大振綱維益明懲勸肇舉改元之

典弘敷在宥之澤可大赦天下改廣德三年為永泰元年自永泰元年正月一日昧爽以前大辟罪已下罪無輕重已發覺未發覺已結正未結正繫囚見徒常赦所不免者咸赦除之僕固懷恩戰伐有功訐謨任重不終臣節輒肆姦凶妄誘異番同為不軌朕惟責已情重舊勲如能翻然來歸必從寬宥其下偏裨等因被驅馳不獲已者及所在山谷草竊反側未安者如能束身而來一切並無所問自廣德元年已前天下百姓所欠負官

物一切放免在官典腹內者不在免限其百姓除正租庸外不得更別有科率刺史縣令與朕分憂凋瘵之人切須撫字一夫不獲情甚納隍有能招輯逃亡平均賦稅增多戶口廣濶田疇清節有聞課効尤著者宜委所在節度觀察具名聞奏即令按覆超資擢授其有理無能政迹涉賊私必當重加貶奪永為殿累農政本也食人天也方春之首重於農作除軍興至急餘一切並停令百姓得專營農事其逃戶復業及浮客情愿編附者

仰州縣長吏親就存撫特矜賦役全不濟者量貸種子
務令安集孝悌力田懷才抱器遺逸未經薦達者各委
州府聞奏親當策試量能叙用應見立仗諸軍將士等
宜共賜錢五萬貫書稱咸秩詩美懷柔仰惟衆靈念茲
多祐其五岳四瀆名山大川宜令所管牧宰精誠致祭
中外寮吏各揚其職無或曠官克副朕意

改元大厯赦

王者欽若昊天誕受丕命莫不叶五紀而乘運稽三微

以體元上齊璿璣下立人極乃頒厯於惟歲更覃恩於
率土朕嗣守洪業恭臨寶位頃時當寇難運屬干戈誓
衆興師為人除害實賴宗社降福寰宇小康用興淳朴
之風庶洽雍熙之化乾坤敷祐大庇生靈文武叶心用
力王室非朕薄德而臻於此乃者金革所聚綿歷歲時
征賦頗繁人猶凋瘵是用疚心疾首當宁興懷罪以在予馭
朽而貽懼每思弘濟之道用拯黎元之敝月經星昴律
中黃鍾合天正之符承日至之永祥雲在矚既當伯趙

之司惠澤布和宜順一陽之氣建元發號革故惟新俾
及履長之節用深行慶之典可大赦天下其永泰二年
宜改為大厯元年自大厯元年十二月十二日昧爽已
前大辟罪已下已發覺未發覺已結正未結正繫囚見
徒罪無輕重常赦所不免者咸赦除之長吏犯賊不在
免限夫從簡之道大易至言薄賦之規前王令範朕志
遵儉約務欲息人徵歛無期誠為勞弊天下百姓除正
租庸及諸軍器用湏外不承正勅一切不得輒有科率

國以人為本人以農為業頃因師旅征稅殷煩編戶流離田疇荒廢永言牧宰政切親人其刺史縣令宜以招輯戶口墾田多少用為殿最每年終本道觀察節度等使按覆聞奏如課績尤異當加超擢或政理無聞必寘科貶逃亡失業萍泛無依特加招綏使安鄉井其逃戶復業者宜給復三年如百姓先貨賣田宅盡者宜委州縣取逃死戶田宅量丁口充給仍仰縣令親至鄉村安存措置務從樂業以贍資糧王畿之間賦歛尤重百役

供億當甚艱辛亥哉疲人良深憫念盍徹之稅著自周
經未便於人何必行古其什一稅宜停周徵俊造漢辟
賢良垂之典籍永代作則天下有安貧樂道孝悌力田
未經薦用者委所在長官具以名聞朕當親自策試量
才叙用其立仗將士等宜賜物犒卹五岳四瀆名山大
川祀典攸存神理昭著宜以禮致祭

唐大詔令集卷四